

儀  
禮  
節  
解

儀禮節解卷六

郝敬習

燕禮第六

燕禮者諸侯與其臣燕飲之禮

燕禮小臣戒與韠者膳宰具官饌于寢東樂人縣玄設洗篚于阼階東南句當東霤霤水在東篚在洗西句南肆句設膳篚在其北西面句司宮尊于東楹之西兩方壺左玄酒南上句公尊瓦大秦兩句有豐句冪用綌若錫句在尊南句南上尊士旅食于門西兩圓壺司宮筵賓于戶西東上無加席也

此將燕陳設也。小臣周禮大僕之屬。諸侯亦有之。戒猶宿也。與與燕諸臣未定爲賓。皆曰與膳宰掌治膳羞。具備也。官饌猶言官府酒饌。寢東路寢東房鄉飲亦云。東壁云左房。養由東出也。縣縣鐘磬之屬。備作樂也。洗以盥濯。篚以承爵解。阼階東南謂東階下之南。卽鄉飲酒禮所謂南北以堂深也。霤檐際也。雨水下溜謂之霤。當東霤鄉飲酒禮所謂東西當東榮也。罍水以罍注水。所以沃洗。在洗與篚之東。篚在洗西。三物并陳也。南肆向南陳。此篚寶諸臣飲器。取南面之義。膳篚寶君飲器。在其北西向陳。君席西面也。司

宮掌宮內之事。尊設酒尊東楹之西堂上。近中也。兩方壺。一酒一玄酒。皆以飲諸臣。左玄酒。水居壺南也。南爲上。上玄酒也。公尊。君飲之尊。瓦大卽瓦甒。兩亦一酒一玄酒。豐形如豆。木爲之。取豐重安穩。承瓦大也。簠。覆尊之巾。綌。粗葛也。錫。麻布之洗。治光澤者。在尊南。謂兩瓦大在兩方壺南。南爲上。上瓦大也。士旅食。謂衆士食廩于官者。周禮謂府史胥徒。孟子謂庶人在官者也。設尊門內西。兩圓壺皆酒也。筵。賓設賓席。室戶西牖間。客位也。東上。統于主也。加席。席上更加坐席。尊者之禮。君在賓無加席也。

按鄉飲射儀二簠一陳堂上。一陳堂下。此二簠皆堂下。臣行禮堂下。取爵便也。

射人告具。小臣設公席于阼階上西鄉。向設加席。公升卽位于席西鄉。小臣納卿大夫卿大夫皆入門右北面東上。士立于西方。東面北上。祝史立于門東北面東上。小臣師一人在東堂下南面。士旅食者立于門西東上。公降立于阼階之東南南鄉。句爾卿卿西面北上。爾大夫大夫皆少進。射人請賓。公曰。命某爲賓。射人命賓。賓少進。禮辭。反命。又命之。賓再拜稽首許諾。射人反命。賓出立于門外東面。公揖卿大夫。句乃升就席。小臣自阼

階下北面請執筯者與羞膳者乃命執筯者執筯者升自西階立於尊南北面東上膳宰請羞于諸公卿者射人納賓賓入及庭公降一等揖之公升就席賓升自西階主人亦升自西階賓右北面至再拜賓答再拜

此君與諸臣卽位迎賓也周禮夏官射人掌公孤卿大夫之位而燕飲用射故陳設旣具則射人告于君設加席公升謂公臨升更加重席也初言西鄉設席也再言西鄉公立也小臣納卿大夫以公命引入也入門右外來東爲右北面向君也東上君在東階諸卿以序立而西也士立西方堂下西也東面向君也

北上。自北以序立而南也。祝以辟除。史以稽察。皆立于門內之東。隨君方也。北面朝君也。東上以序立而西也。小臣師。小臣之長。東堂下。近君聽使令也。士旅食者。立于門內西。東上北面。以次並立而西也。公降下阼階也。爾邇同近也。君降階迎卿大夫皆進立庭下。卿始入門右北面。今轉西面北上。以次立而南待獻而後升也。大夫皆少進立庭下北面。東上如故。不西面。別于卿也。不言士。無席堂上也。請賓。請君命誰爲賓也。命某。命大夫也。卿不爲賓嫌逼也。賓出以賓禮更入也。公揖卿大夫。公將升揖也。乃升。君升阼階。

也就席。君先就席也。請執筯。請君命執瓦大之筯者。羞膳。進君酒者。言命執筯。不言命羞膳。文省也。燕主酒。而羞膳者。無常位。執筯者。階上北面。特表之也。羞于諸公卿。進諸公卿酒者。主人宰夫也。燕義云。設賓主。使宰夫爲獻主。周禮天官膳夫職亦云。王燕飲酒。則爲獻主。王膳夫上士。則諸侯宰夫亦士。士代君主。猶孫爲王父尸也。士立西方。故賓西升。主人亦從之。升下文云。薦主人于洗北西面。則主人席堂下東也。賓右。主人居賓右。北面。東爲右也。至賓至也。再拜。主人拜至也。



按鄭謂羞膳者不升堂自堂東升自北階房中西面  
南上鑿說也斯禮本公燕臣而稱臣亦曰諸公是用  
王禮也惟王臣有公諸侯之臣稱公自季世始王燕  
飲使膳夫主獻此一人之禮未聞諸侯也飲臣而不  
自主賓大臣而主以士簡也天子尊無二上臣代主  
可諸侯用之泰也昔齊景公用斯禮饗魯昭公以臣  
待魯侯而以王自處昭公所以去之世儒定以爲諸  
侯燕禮不亦好大之過與議禮者不可不辨也

主人降洗句洗南西北面賓降階西東面主人辭降賓  
對主人北面盥坐取觚洗賓少進辭洗主人坐奠觚于

醴與對賓反位主人卒洗賓揖乃升主人升賓拜洗主人賓右奠觚答拜降盥賓降主人辭賓對卒盥賓揖升主人升坐取觚執冪者舉冪主人酌膳執冪者反冪主人筵前獻賓賓西階上拜筵前受爵反位主人賓右拜送爵膳宰薦脯醢賓升筵膳宰設折俎賓坐左執爵右祭脯醢奠爵于薦右興取肺坐絕祭齊之興加于俎坐挽右手執爵遂祭酒興席末坐啐酒降席坐奠爵拜告旨執爵興主人答拜賓西階上北面坐卒爵興坐奠爵遂拜主人答拜

此主人獻賓也洗在堂東下宰夫降西階往就洗南

西北面向賓也。賓降西階東面立。主人自洗南遙向賓辭其降也。盥盥手。先盥手而後洗觚。二升曰觚。爵類取洗西甬中角觚。不用爵。避正主也。賓少進自西階下進而東也。反位。反西階下東面之位。賓每先主人升賓尊也。既洗又盥。將酌盥手也。舉冪待酌也。酌膳酌。君膳尊之酒。代君獻賓。故酌君尊。反冪既酌。反冪于尊上筵前。房戶西席前也。主人賓右拜。拜于筵前。賓之東也。折俎。折牲脊脅肩肺爲賓俎。賓坐左執爵以下。解見鄉飲酒禮。

賓以虛爵降。主人降。賓洗南坐奠觚。少進辭降。主人東

面對賓坐取觚奠于篚下盥洗主人辭洗賓坐奠觚于  
篚興對卒洗及階揖升主人升拜洗如賓禮賓降盥主  
人降賓辭降卒盥揖升酌膳執筯如初以酢主人于西  
階上主人北面拜受爵賓主人之左拜送爵主人坐祭  
不啐酒不拜酒不告旨遂卒爵興坐奠爵拜執爵興賓  
答拜主人不崇酒以虛爵降奠于篚賓降立于西階西  
射人升賓賓升立于序內東面

此賓酢主人也賓以虛爵降將往洗以酢主人主人  
降亦自西階從賓也如賓禮如初獻賓拜洗主人賓  
右答拜也酢主人亦酌膳亦以君尊報獻也執筯如

初既舉反之也。酢主人于西階上，別于正主也。主人  
不啐酒，亦避正主也。不拜酒，告旨主道也。禮賓酢主  
人，則薦脯醢，設折俎。此臣代君主，故無薦，無設，至獻  
大夫，乃薦主人于洗北也。不崇酒，避正主敬君尊也。  
賓降立于西階西，主人將獻君，不敢居堂上也。射人  
升賓，君命升也。序內堂西序內，東面，面君也。

主人盥洗象觚，升賓之東北面，獻于公。公拜受爵，主人  
降自西階，阼階下北面拜送爵。士薦脯醢，膳宰設折俎。  
升自西階，公祭如賓禮。膳宰贊授肺，不拜酒，立卒爵，坐  
奠爵拜，執爵與主人答拜。升受爵以降奠于膳，能更爵。

洗升酌膳酒以降酢于阼階下北面坐奠爵再拜稽首公答再拜主人坐祭遂卒爵再拜稽首公答再拜主人奠爵于篚

此主人獻公自酢也象觚觚以象骨爲飾實于膳篚者也獻公獻君也公在東階上故東北面公拜受爵獻禮重也主人自西階降往東階下北面拜送爵臣禮也升降不敢由阼避正主也折俎折脊脅肺爲君俎君祭不興取肺祭則膳宰授之旣祭則膳宰受之不拜酒不拜告旨也立卒爵不坐也凡男子坐卒爵奠爵乃拜婦人立卒爵執爵拜此立卒爵而奠爵拜

者君禮也。升受爵自西階升也。更爵改取南簠之觚。不敢襲君器也。酌膳酒將自酢也。君不酢臣。主人自酢。承君之意也。既更君爵。仍酌君尊。明酢出于君也。主人盥洗升。媵觚于賓。酌散西階上坐奠爵拜賓。賓降筵北面答拜。主人坐祭遂飲。句賓辭。句卒爵拜。賓答拜。主人降洗。賓降。主人辭降。賓辭洗。卒洗揖。升不拜洗。主人酌膳。賓西階上拜。受爵于筵前。反位。主人拜送爵。賓升席坐祭酒。遂奠于薦東。主人降復位。賓降筵西。東南面立。

此主人酬賓。媵言酌。謂舉也。初獻爲正。再酌爲媵。媵

副也與騰通貳嫡曰媵獻而又酬所以爲媵酌散酌方壺酒散猶雜也君尊爲善臣尊爲散酌散將自飲導賓也賓降筵降戶西南面之筵凡酬主人坐祭先自飲後酌賓禮出于君不敢當坐故賓辭欲直受此爵無煩主人坐飲也賓不飲酬酒猶必坐祭後奠敬君也賓降筵西東南面立疑立向君也

按鄭註媵爵爲送爵本送女作解又謂騰字之誤皆非也賓自酢主人後立序內至主人酌散賓降自筵者當主人盥洗升賓已就筵矣或疑降筵爲誤非也初賓酢主畢降立西階君命升立西序內今酬畢不



復降。重違君命也。不反于西序內。避賓位也。鄭云不立序內。位彌尊也。位彌尊者。其禮彌卑。鑒說也。

小臣自阼階下請媵爵者。公命長。句小臣作下大夫二人媵爵。媵爵者。阼階下皆北面再拜稽首。公答再拜。媵爵者。立于洗南。西面北上。序進。盥洗角觶。升自西階。序進酌散。交于楹北。降阼階下。皆奠觶。再拜稽首。執觶興。公答再拜。媵爵者皆坐祭。遂卒觶。興坐奠觶。再拜稽首。執觶興。公答再拜。媵爵者執觶待于洗南。小臣請致者。若君命皆致。則序進奠觶于篚。阼階下皆再拜稽首。公答再拜。媵爵者洗象觶。升賓之。序進坐奠于薦南。北上。

降阼階下皆再拜稽首送解公答再拜

此下大夫二人媵爵爲旅酬之始長謂下大夫長者不言下大夫媵爵下大夫常職也作猶使也北面稽首拜君命也大夫位在庭下洗在阼階下故大夫就阼階下北面拜君興卽立洗南盥洗角觶以角爲解序進謂先者洗後者乃進先洗者升立西階上俟後洗者序進酌散謂先者旣酌退立西階上後者乃進酌也二大夫遞進酌酒于東楹西交相遇于西楹之北旣酌復以序降西階過東階下再拜稽首執解待于洗南以俟君命乃洗酌不敢徑進也洗南卽阼階

下設洗之南請致請君命二臣致酒或用一或用二  
若君命二人皆致二大夫以序進阼階下拜君命也  
薦南脯醢南北上謂二觶以序奠自北而南也必奠  
薦南者君南面與尋常奠爵薦右異也

公坐取大夫所饔觶興以酬賓賓降西階下再拜稽首  
公命小臣辭賓升成拜公坐奠觶答再拜執觶興立卒  
觶賓下拜小臣辭賓升再拜稽首公坐奠觶答再拜執  
觶興賓進受虛爵降奠于篚易觶洗公有命則不易不  
洗反升酌饔觶下拜小臣辭賓升再拜稽首公答再拜  
賓以旅酬於西階上射人作大夫長升受旅賓大夫之

右坐奠觶拜執觶與大夫答拜賓坐祭立飲卒觶不拜  
若膳觶也則降更觶洗升賓散大夫拜受賓拜送大夫  
辯句受酬如受賓酬之禮不祭卒受者以虛觶降奠于  
筐

此君爲賓舉旅也升成拜賓下堂拜未成君命升西  
階上再拜稽首成禮也君答再拜答于阼階上也君  
既自飲不酌以虛爵授賓異于敵者親酌授也賓易  
他爵洗臣不敢襲君器也君命不易遂不洗用尊者  
之器洗則嫌于不潔也賓以君酬已之爵于西階上  
轉酬諸臣大夫長卽卿也賓與大夫長皆西階上北

面而賓居右北面東爲右也。旅酬酒不坐祭。賓獨坐祭。此君賜也。膳解卽象觚。賓旣飲此酒。更取角解洗升實以散尊之酒。酬大夫。酬不洗爵。此獨洗者。更解新之後不復洗也。衆大夫轉相酬徧。受酬者亦如賓。右坐奠解。拜大夫答拜。但不如賓受膳解坐祭。旅酬皆不祭也。卒受者。謂下大夫末一人。無所酬。飲于西階上。奠爵復位。三旅皆自大夫止。不及士也。

按。媵爵有二。君以一酬賓。一尚在薦南。後一人再媵。遂成三爵。酬不及士。堂上無士席。三旅後乃徧及也。更解與易解同。鄭云。尊言更。新之。卑言易。故之也。

主人洗升實散獻卿于西階上。司宮兼卷重席設于賓左。東上。卿升拜受觚。主人拜送觚。卿辭重席。司宮徹之。乃薦脯醢。卿升席坐。左執爵。右祭脯醢。遂祭酒。不啐酒。降席西階上。北面坐。卒爵興坐。奠爵拜執爵興。主人答拜受爵。卿降復位。辯獻卿。主人以虛爵降奠于篚。射人乃升卿。卿皆升就席。若有諸公。則先卿獻之。如獻卿之禮。席于阼階西北面。東上。無加席。

此主人獻卿也。前主人獻賓。獻君。君舉酬賓。敬賓禮成矣。乃及諸臣。首卿。大國三卿。卿重席。獻則兼捲三卿之重席以待設也。賓左。賓席東也。東上。以次而西。

也。卿升，升西階上，拜送。拜，卿右也。禮，卿重席，辭以迫近君，避也。有脯醢，無俎。燕禮主羞，唯賓與君有俎。主人答拜受爵，受虛爵也。卿降復位，復堂下西面北上之位。俟君命，後升就席也。諸公位在卿上。大國之孤也。席于阼階西北面，與賓席對。蓋尊統于君，君在東階西面，則諸公席爲左，而賓與大夫席爲右也。加席，重席之上，加坐席，臨坐設之，優禮也。君在故無加，加席尊于重席。卿辭重席，公但云無加，席則其重席亦可知也。

按諸侯臣稱公，衰世之僭也。鄭謂諸公爲大國之孤。

據周禮典命而孟子云天子一位公一位君一位卿一位大夫一位則周禮非古也且使大國有孤亦惟一人何稱諸公鄭又引牧伯三監附會是明用天子禮也君亦稱公何以別乎名分旣乖而講于升降之節抑末矣是書所以可疑也

小臣又請媵爵者句二大夫媵爵如初請致者若命長致則媵爵者奠解于篚一人待于洗南長致致者阼階下再拜稽首公荅再拜洗象解升實之坐奠于薦南降與立于洗南者二人皆再拜稽首送解公荅再拜公又行一爵若賓若長唯公所酬以旅于西階上如初大夫



卒受者以虛解降奠于筐

此再饔餼于君君再旅酬也每主人一獻則一饔餼君君爲一舉旅茲小臣又請饔餼蓋主人既獻卿又歸酬于君也二大夫卽初命二大夫命長致請君命尊者一人送解若者不定之辭或一或二或先一後二或先二後一或三爵唯君所命奠解于筐二人將拜奠也奠于薦南于先饔餼舉旅所餘一解之下也公又行一爵卽行先饔餼所餘解也長謂諸臣之長若亦不定之辭如初謂公飲受虛爵更解辯酬等禮皆同也大夫卒受亦不及士也

主人洗升獻大夫于西階上大夫升拜受觚主人拜送  
觚大夫坐祭立卒爵不拜既爵主人受爵大夫降復位  
胥薦主人于洗北西面脯醢無胥蒸辯獻大夫遂薦之  
繼賓以西東上句卒句射人乃升大夫大夫皆升就席  
此主人獻大夫也獻卿畢次大夫不祭脯醢不拜既  
爵禮殺于卿也坐祭祭酒也獻大夫于西階上不升  
就席故不祭脯醢至終燕脫屣升席而後祭也降復  
位反堂下北面東上之位也胥宰夫之屬宰夫本土  
位西方以爲主人故薦于東階下洗之北也後云士  
既獻者皆立于東方西面士卑不妨從君東如祖孫

共昭之義所薦止脯醢無胾無俎也胾胾通肉在俎  
曰胾卿以下皆無俎獨于主人云者主人疑有俎也  
辯獻大夫遂薦之謂大夫非一人以次獻則薦薦則  
布席其席繼賓席西以東爲上而西也卒謂獻諸大  
夫畢射人乃升大夫君命升也大夫非一人得獻者  
降反堂下北面之位獻皆畢而後同升就賓西之席  
也

按鄭謂大夫辯獻之乃薦畧賤也獻而後布席非也  
獻而後布席者惟士爲然大夫獻于西階上獻卽布  
席矣但不就席祭薦所以爲殺于卿而降于士耳

席工于西階上少東樂正先升北面立于其西小臣納  
工工四人二瑟小臣左何瑟面鼓執越內弦右手相入  
升自西階北面東上坐小臣坐授瑟乃降工歌鹿鳴四  
牡皇皇者華卒歌主人洗升獻工工不興左瑟句一人  
拜受爵主人西階上拜送爵薦脯醢使人相祭卒爵不  
拜主人受爵衆工不拜受爵坐祭遂卒爵辯有脯醢不  
祭主人受爵降奠于篚公又舉奠解唯公所賜以旅于  
西階上如初卒笙入立于縣中奏南陔白華華黍主人洗  
升獻笙于西階上一人拜盡階不升堂受爵降主人拜  
送爵階前坐祭立卒爵不拜既爵升授主人衆笙不拜

受爵降坐祭立卒爵辯有脯醢不祭乃間歌魚麗笙由  
庚歌南有嘉魚笙崇丘歌南山有臺笙由儀遂歌鄉樂  
周南關雎葛覃卷耳召南鵲巢采芣采蘋大師告于樂  
正曰正歌備樂正由楹內東楹之東告于公乃降復位  
此三獻後樂作而君三舉旅酬也鄉飲酒記云凡舉  
爵三作而不徒爵故主人三獻成樂作也席工以下  
獻工之儀解見鄉飲篇主人洗升獻工獻大師也鄉  
飲酒禮云大師則爲之洗公又舉奠解舉前長一人  
所媵解奠于薦南者前後媵三解一酬賓再酬賓長  
三惟公賜卒謂旅畢笙入以下解見鄉飲篇縣中所

謂磬南北面也。樂正由楹內者。樂正立。工西。工坐。階際。樂正往堂東。必由楹內也。東楹之東。往君阼階上。西面之位也。降復位。立階下。縣間之位。卽鄉飲記云。磬階間。縮雷北面也。

按鄉飲酒。用歌工四人。鄉人士大夫之禮。燕禮亦工四人是。諸侯用士樂也。周禮夏官小臣四人。公燕小臣相工四人。其他請媵辭賓之類。又小臣則諸侯小臣不多于天子乎。故禮言難盡合也。

射人自阼階下。請立司正。公許。射人遂爲司正。司正洗角觶。南面坐。奠于中庭。升東楹之東。受命。西階上北面。

命卿大夫。君曰：「以我安。」卿大夫皆對曰：「諾，敢不安。」司正降自西階，南面坐，取觶升，酌散降，南面坐，奠觶，右還北面，少立，坐，取觶興，坐，不祭，卒觶，奠之，興，再拜稽首，左還南面坐，取觶洗。句南面反，奠觶于其所。句升自西階，東楹之東，請徹俎降。公許，告于賓。賓北面，取俎以出。膳宰徹公俎，降自阼階，以東。卿大夫皆降，東面北上。賓反入，及卿大夫皆說。脫屢升就席，公以賓及卿大夫皆坐，乃安。羞庶羞。大夫祭薦，司正升受命。句皆命。句君曰：「無不醉。」賓及卿大夫皆興，對曰：「諾，敢不醉。」皆反坐。

此立司正徹俎坐燕也。自初燕至此，主人獻禮皆備。

君三舉爵樂作禮成矣將坐燕以安賓先立司正監之蓋初燕禮嚴終則易懈初酬賓卿大夫夫人少終酬士人衆故正之以司正也射人爲司正無君命常職也洗解奠于庭表其事也必南面中庭示明作也楹東受命受君安賓之命西階命卿大夫傳君之命也君曰以我安卽命辭以猶與也我君自謂也賓安則我安望諸臣共畱安賓因以安君慇懃誠切之至也右還右體旋向東將適解南先東面從解東而南轉北面也北面少立示嚴重也左還南面將適解北以左體旋向東自東而北轉面南也往來皆由解東君



在東從君也。南面及奠解。自洗及奠解。亦南向也。其所卽中庭初奠之所。徹俎安賓使坐也。解見鄉飲篇。諸臣不敢告徹而司正請達君意也。人臣升降由西階。膳宰徹君俎降由阼階。重君物別于諸臣也。以東歸東壁也。皆坐乃安。君始命安俎。未徹不敢坐。至是俎徹升坐。乃終君安賓之命也。羞進也。庶羞。載醢。魚膾之類。大夫祭薦。祭脯醢也。初獻大夫于西階上。未升席。故未祭。至是升席乃祭也。司正升受命。受君命也。皆命司正以君命徧命也。君曰無不醉。命辭也。按右還左還與鄉射拾取矢還同。鄭謂右還將適解。

南先西面往來由解西非也。又云大夫祭薦謂不敢于盛成禮亦非也。初薦未卽席非卽席不祭也。

主人洗升獻士于西階上。士長升拜受解。主人拜送解。士坐祭立飲。不拜。旣爵其他不拜。坐祭立飲。乃薦司正與射人一人。司士一人。執冪二人。立于解南東上。辯獻士。士旣獻者。立于東方。西面北上。乃薦士。祝史小臣師亦就其位而薦之。主人就旅食之尊而獻之。旅食不拜受爵。坐祭立飲。

此主人獻士也。樂終而後獻士。士卑也。士長士之尊者。如司正司士等是也。拜受不拜。旣爵禮殺也。其他

謂長以下卽祝史小臣等不拜。謂受送皆不拜也。乃薦。謂旣獻于西階上。乃以脯醢各薦于其位。先薦司正等四人。先長也。司正卽射人爲之。故曰一人司士衆士之長。四人皆主人拜送。解位庭中。解南與衆士殊也。東上。以次並立而西也。辯徧通獻士。獻衆士卽所謂其他不拜者也。衆士旣受獻于西階上。降立于東方。西面北上。乃各以脯醢薦于其位。與獻主人于洗北。西面同也。祝史小臣師皆衆士。祝史立門東。小臣立東堂下。各就本位薦之。此以上獻士。皆堂上方壺之尊也。旅食之尊。門西兩園壺也。士旅食者立于

門西東上。主人就其尊所獻之。不拜受爵。則既爵不拜。可知賤故畧也。

若射。則大射正爲司射。如鄉射之禮。

此燕而大射之儀也。若者。不定之辭。射與不射。唯君命。君射曰大射。大射正射人之長也。

賓降洗。升媵觚于公。酌散下拜。公降一等。小臣辭。賓升再拜稽首。公答再拜。賓坐祭卒爵。再拜稽首。公答再拜。賓降洗象觶。升酌膳。坐奠于薦南。降拜。小臣辭。賓升成拜。公答再拜。賓反位。

此賓媵爵于君也。媵爵本下大夫事。賓亦爲之者。賓

受君施多矣。至是亦致臣于之愛。不敢終以賓自處也。飲君而酌散。先自飲也。公降一等。敬其爲賓也。賓洗象觚。更爵奉君也。

公坐取賓所媵觶興。唯公所賜受者如初。受酬之禮。降更爵洗升酌膳下拜。小臣辭升成拜。公答拜。乃就席坐。行之有執爵者。唯受于公者拜。司正命執爵者爵辯。句卒受者興以酬士。句大夫卒受者以爵興。西階上酬士。士升。大夫奠爵拜。士答拜。大夫立卒爵不拜。句賓之。句士拜受。大夫拜送。士旅于西階上。辯士旅酌。卒主人洗。升自西階。獻庶子于阼階上。如獻士之禮。辯降洗。遂獻。

左右正與內小臣皆於阼階上如獻庶子之禮

此君爲士舉旅而不卽賜士由貴遠賤也前此君三舉旅一爲賓再爲卿三爲大夫未及士以下故因賓賡之爵再舉旅以終惠也受者如初酬如賓初受君酬拜下易爵等禮同也降更洗爵謂受者旣卒爵不敢以君爵行旅更洗角觶也前三舉旅君命勿易爵故不更此無君命將徧及羣下故必更也下拜升成拜爲堂上賓卿大夫先受公賜者必成禮也其次皆就席坐行無復拜送立飲之禮前此賓卿大夫相酬三旅已成此舉爲士以下故可畧也有執爵者謂有

代酌行爵之人坐者可無起也。唯最初一人受公賜爵者拜。其餘執爵者所送皆就席坐飲不拜也。司正命執爵者爵辯達君意也。辯徧通。卒受者興以酬士亦司正命也。堂上之席止于大夫。卒受者卽大夫也。席于堂上者坐。士立于堂下。大夫酬士則起。西階上士升受酬。酬者奠爵拜。先自立飲實之。拜受拜送。旅酬之正禮也。始酬士盡禮不得如賓卿大夫就席坐行也。士旅于西階上辯。謂自士之長以至祝史小臣皆徧。士旅酌。謂衆士自酌酒無執爵者也。卒。謂酬士畢也。庶子左右內小臣皆君侍從之臣。主人于獻士

後皆獻之。庶子卽公卿大夫子侍衛者。左右君左右。詩云。膳夫左右正長也。內小臣奄士以上三臣在君側。就阼階上獻之。

按周禮夏官諸子。爵下大夫。掌庶子之事。鄭謂庶子卽諸子。誤也。庶子未受爵命。故不與大夫士同獻酬。無算爵。句士也。有執膳爵者。句有執散爵者。執膳爵者酌以進公。公不拜受。執散爵者酌以之公。句命所賜所賜者興受爵。降席下奠爵。再拜稽首。公答拜。句受賜爵者以爵就席坐。句公卒爵然後飲。執膳爵者受公爵。句酌。句反奠之。句受賜爵者興授執散爵。執散爵者乃



酌行之。唯受爵於公者拜。卒受爵者興以酬士于西階上。士升。大夫不拜。乃飲賓爵。士不拜受爵。大夫就席。士旅酌亦如之。公有命徹筯則卿大夫皆降西階下。北面東上。再拜稽首。公命小臣辭。公答再拜。大夫皆辟。遂升反坐。士終旅于上如初。無算樂。賓則庶子執燭於阼階上。司宮執燭於西階上。甸人執大燭於庭。閭人爲大燭於門外。賓醉北面坐。取其薦脯以降。奏陔。賓所執脯以賜鐘人于門內。雷遂出。卿大夫皆出。公不送。

此旅酬旣畢。無算爵。賓醉以出也。無算以醉爲節。不限數也。士也。謂執爵皆士也。膳爵。君之爵。散爵。賓卿

大夫之爵酌以進公酌膳尊不拜送也酌以之公酌方壺往俟君命也所賜者與受爵無算爵之始自君賜賓始也席下席西也再拜卽下云唯受爵于公者拜也次與衆相酬無復拜禮前承君旅降拜升成拜此不降禮將終漸殺也執膳爵者受公爵謂公旣飲奠爵受虛爵又酌奠君所俟君再舉也受賜爵者謂賓卿大夫受公賜就席坐飲卒爵起以虛爵授執散爵之士代酌行之也卒受爵者在坐大夫也與上節酬士禮同而此則大夫不復奠拜先飲士亦不拜直受大夫卽還就席禮終而愈殺也士旅酌亦如之謂

士受爵與衆相酌皆不拜也公命徹罍公尊瓦大有  
罍命徹之示欲罄此尊也尊有酒罍罄則不罍欲與  
諸臣盡歡所以卿大夫降拜稽首也不言賓禮終賓  
卑卽大夫也大夫皆辟卿可知也不言士士無席堂  
上也遂升卿大夫升堂反坐也士方旅而卿大夫降  
旅暫止公辭卿大夫復升士乃終旅于西階之上如  
初也無算樂升歌間合不拘正樂三終之數也宵燕  
終至宵也甸人掌供薪蒸閭人掌昏閉門大燭門外  
俟賓出也賓醉燕以醉爲節衆出以賓爲節也取薦  
脯榮君惠也奏陔奏陔夏之樂陔言階也行有階級

次第戒失禮也。鐘人擊鐘奏夏者，賜脯以報之也。內  
雷門內檐下，公不送賓。賓本臣始無迎，終亦無送也。  
公與客燕，曰：寡君有不腆之酒，以請吾子之與寡君須  
臾焉。使某也以請。對曰：寡君君之私也。君無所辱賜于  
使臣，臣敢辭。寡君固曰：不腆使某固以請。寡君君之私  
也。君無所辱賜于使臣，臣敢固辭。寡君固曰：不腆使某  
固以請。某固辭不得命，敢不從。句致命句曰：寡君使某  
有不腆之酒，以請吾子之與寡君須臾焉。君貺寡君多  
矣。又辱賜于使臣，臣敢拜賜命。

此君燕鄰國使臣，攢往請而客與攢告答之辭。攢三

請客再辭乃許私猶屬也謙不敢爲敵也寡君固曰  
擯再請也寡君君之私以下客再辭也又寡君固曰  
擯三請也某固辭不得命敢不從客始許諾也致命  
曰以下擯乃致君命于客也君貺寡君以下客拜命  
也

按自王道衰禮樂自諸侯出而敵國之禮始重故使  
臣相命其辭如此是書所以多衰世之意也

記○燕朝服於寢其牲拘也亨于門外東方○若與四  
方之賓燕則公迎之于大門內揖讓升賓爲荀敬席于  
阼階之西北面有胥烝不嘽肱不啐酒其介爲賓無膳

尊無膳爵與卿燕則大夫爲賓與大夫燕亦大夫爲賓  
羞膳者與執冪者皆士也羞卿者小膳宰也○若以樂  
納賓則賓及庭奏肆夏賓拜酒主人答拜而樂闋公拜  
受爵而奏肆夏公卒爵主人升受爵以下而樂闋升歌  
鹿鳴下管新宮笙入三成遂合鄉樂若舞則勺○唯公  
與賓有俎○獻公曰臣敢奏爵以聽命凡公所辭皆栗  
階凡栗階不過二等凡公所酬旣拜請旅侍臣凡薦與  
羞者小膳宰也有內羞○君與射則爲下射袒朱襦樂  
作而后就物小臣以巾授矢句稍屬不以樂志句旣發  
則小臣受弓以授弓人上射退于物一筭素旣發則答

君而俟若飲君句燕則夾爵君在大夫射則肉袒○若與四方之賓燕滕爵曰臣受賜矣臣請贊執爵者相者對曰吾子無自辱焉○有房中之樂

朝服解見鄉飲酒記寢君路寢狗陽物門外東方爨也古寢廟門外皆有爨吉在東凶在西亨于門外盛其禮也四方之賓鄰國卿大夫來聘者公迎公親爲主人也賓爲苟敬賓不居賓位主人故隆其敬也敬賓正也致敬而不爲賓故謂苟敬蓋君燕臣則大夫爲賓四方使臣來聘者皆卿其介皆大夫則以其大夫爲賓而以卿居諸公之位爲苟敬與燕本國賓禮

同也。席阼階之西北面。卽諸公之位也。以本國諸公之位居鄰國之卿。示優禮也。有胥謂有俎。盛其禮也。不齊肺。不啐酒。不爲賓也。其介爲賓。則齊肺啐酒。無膳尊。君與賓同尊。不別設瓦大。無膳爵。與賓同爵。不更象觚。此與燕本國臣禮殊也。凡君賜臣燕。所燕之臣不得爲賓。爲苟敬。如燕爲卿。設卿不敢當賓。必使大夫爲賓。若燕爲大夫。設所燕之大夫。亦不敢當賓。必使他大夫爲賓也。羞膳。謂酌膳尊。羞膳與執冪者皆奉君。故皆用士。羞卿。謂酌卿大夫酒者。用小膳宰。卑于士也。不言賓。謂賓亦用士。與君同也。以樂納賓。



賓之貴者入則樂作肆夏樂章名主人宰夫代爲主人也賓入至庭則擊鐘鼓奏肆夏及主人獻賓賓拜告旨而后樂闋以敬賓也主人獻公公拜受爵則又奏肆夏及公卒爵主人受爵降而后樂闋以敬君也升歌工自西階升堂鼓瑟歌下管堂下以管吹詩管簫屬新宮逸詩篇名笙入入庭下三成謂奏南陔白華華黍遂合聲謂衆音合作也鄉樂二南關雎等六詩以其爲列國之風鄉邦用之故謂鄉樂勺周頌大武之詩舞勺歌勺以舞也獻公主人獻公及賓媵解於公聽命不敢望君必受也凡公所辭辭拜下也栗

階猶歷階。凡升階兩足並一級更進曰拾。一足一級曰歷。一等一足不過二等。過二等則超躍失儀矣。凡公所酬謂公四舉旅受君酬者。飲訖自酌降升拜。將往西階上酬卿大夫。必以旅侍臣請于君。不敢直行也。凡薦謂薦俎羞。謂庶羞與前羞。膳羞卿異前言酒。小膳宰惟羞卿。此則君賓卿大夫薦羞皆小膳宰也。內羞如醢醢實豆。糗餌實邊之類。自中饋女工出者。外庖所煎和脯醢之類曰庶羞。君與射以下解見鄉射篇。稍屬四矢稍稍連屬不絕以授君也。志誌通不以樂志謂君射不必以樂爲節。凡射俟同耦揖降發。

畢弓猶在手惟君既發小臣卽受弓以授弓人不俟  
同耦也若飲君謂君不勝當飲則勝者如燕禮賡觶  
于君先自飲及君飲訖又自飲故曰夾爵房中之樂  
所謂縵樂也無鐘鼓而有管絃奏之房中詩云左執  
簧右招我由房周禮春官旄人掌散樂賓客以舞其  
燕樂卽房中之樂也

按鄭解栗階不過二等謂升階不盡二等左右足各  
一發升堂非也薦羞者小膳宰謂爲卿以下然則前  
云羞卿者小膳宰二語不重出乎房中之樂繫之末  
簡其非盡雅樂可知鄭必以二南當之亦非也大抵

此禮之儀多可疑。君燕其臣以宰夫爲主，以大夫爲賓，可也。燕他國之臣而君自爲主，亦以其大夫爲賓，何哉？非所尊而故以爲賓，非所賓而苟以爲敬，苟非君子所以名禮也。子云：物不可苟合。行禮而苟，忠信之薄，君子弗由也。列國之聘必以卿，上介必以大夫，此五霸之令，小國事大國，故大國之卿尊于小國諸侯。如春秋晉韓起、趙孟之聘，主君皆屈體下之，所謂苟敬，非先王之禮也。夫以諸侯相聘，必使其卿，有如諸侯聘天子，將誰使乎？凡燕爲賓設也。先王唯曰：我有嘉賓，式燕以樂。今所燕非所賓，所賓非所燕，虛文。

無實。豈敦厚崇禮之義。如謂君不可為主。臣不可為賓。則大夫獨非臣與。而燕亦可勿設矣。先王所為燕。不可見其義可知。蓋飲食致養生人之情。醉飽興戎。無禮節之也。一爵之肉。一爵之酒。卽愛敬辭讓之心。而仁義之實也。雖以臣子之賤。奉君父之尊。必再拜而后受。坐祭而齊。啐卒爵而拜。如此其不苟者。人亦可以反求而自得矣。如以飲食醉飽爾。爪牙搏噬禽獸皆然。何事于人。故文因情設。禮由義起。義以爲質。禮以行之。遜以出之。信以成之。遜出無信。好禮無義。規規虛文浮格。何以言禮。故君子名必可言。言必可

行。君子于言無所苟而已矣。國君燕大賓屠一狗。事  
近褻。卽名其實爲苟。敬始于緯。裨齊諧不似先王正  
大典禮崇雅之訓。

儀禮節解卷六終

儀禮節解卷七

郝敬習

大射儀第七

大射諸侯與其臣燕而射也。凡天子之事稱大。諸侯稱大非古也。不曰禮曰儀。射主儀也。射者爭之器。行之以揖讓。故貴儀。子云射者何以射。何以聽。循聲而發。發而不失正。唯賢者乎。射有儀所以難也。記云天子將祭先習射。中多者得與於祭。夫射中而不失儀。承大祭可也。鄭謂大射專爲祭行。不盡然也。鄉飲酒有射。燕亦有射。鄉射先鄉飲酒。大射先燕。凡射有酒。

有賓大射燕射鄉射賓射一也

大射之儀君有命戒射宰戒百官有事於射者射人戒諸公卿大夫射句司士戒士射句與贊者

此將射而戒百官也君有命謂諸侯有命行射戒預告也宰猶尹也百官之長卽大宰也有事於射者諸執事者也射人戒諸公卿大夫司士戒士戒欲與射者也贊相禮也

前射三日宰失戒宰及司馬射人宿視滌司馬命量人量侯道與所設之以狸繫步大侯九十參七十干五十設乏各去其侯西十北十遂命量人巾車張三侯大侯



之崇見鵠於參參見鵠於干干不及地武不繫左下綱  
設乏西十北十凡乏用革

此張侯也宰夫卽燕主人宰膳宰宰夫之屬掌治官  
饌故宰夫戒之司馬射人皆掌射事滌謂灑埽洗濯  
量人司馬之屬主量道里遠近侯道謂自堂上去侯  
所之地乏唱獲者所居解見鄉射侯道遠近各有程  
量人以狸步量之狸貓屬伺物擬步而發必獲故量  
侯道謂狸步也三尺曰跬六尺曰步弓長六尺故步  
亦六尺九七五十皆言步也大侯大射之侯周禮天  
官司裘云王大射虎侯熊侯豹侯諸侯熊侯豹侯卿

大夫麋侯。夏官射人職云。王射三侯。諸侯射二侯。孤卿大夫射一侯。士射豭侯。今云大侯九十。是熊豹侯。天子之侯道九十步也。參謂參于二侯之間。卽孤卿大夫所共射之麋侯七十步也。于迫近也。近易于卽士所射豭侯在內近五十步也。三侯同道連設。由堂而南五十步。張干侯。又南二十步。張參侯。又南二十步。張大侯。參侯立二侯中。故曰參。大射則君與孤卿大夫士皆在。故連張三侯。設乏三侯皆設乏也。西北各侯之西北十。謂十步。各乏離各侯西侯北皆十步也。巾車官名。掌車帷裳。侯亦巾類。故命與量人共張。

之三侯道有遠近侯亦有大小大侯最大參侯次之  
干侯最小侯小則卑侯大則崇崇者遠在外卑者近  
在內諸侯堂高七級自堂上射故豻外見參之鵠參  
外見大侯之鵠鵠大鳥鵠屬足跡曰武武長尺二寸  
不及地武謂豻侯下網離地尺二寸以在內最近易  
見者約之二侯在外可知矣不繫左下網解見鄉射  
再言西十北十前言量此言設也乏用革用皮蔽矢  
也

按周禮射人職云王射三侯九節諸侯二侯七節則  
是大侯九十弓者王射也今諸侯用之稱大射其卿

大夫侯道用七十得非僭邪鄭謂千侯當作豳侯猶可至謂參侯作糝侯鑿甚矣又謂參侯去地一丈五寸少半寸大侯去地二丈二尺五寸少半寸尤非也考工記云梓人爲侯廣與崇方參分其廣而鵠居一鄉射記云鄉侯道五十弓弓二寸以爲侯中中卽鵠也二五爲十尺則是五十弓之鵠方一丈也三分之則鄉侯高廣凡三丈卽千侯也參侯七十弓高廣三丈四尺大侯九十弓高廣三丈八尺侯在外者漸遠漸高而堂上地又高故其鵠可見鄭疑過大故解侯中爲全侯而以大侯全體爲高一丈八尺又疑不見

鵠故以爲張之去地二丈二尺五寸。于事理轉謬矣。  
古之射者所重在禮。不以中小爲能。故侯中崇廣。取  
象大鳥。乃所以爲近情。而鄭反謂鵠爲小鳥。難中。又  
左矣。

樂人宿縣于阼階東。笙磬西面。其南笙鐘。其南鐃。皆南。  
陳建鼓在阼階西。句南鼓。句應鼙在其東。句南鼓。句西  
階之西頌磬。東面。其南鐘。其南鐃。皆南。陳。句一建鼓在  
其南。句東鼓。句朔鼙在其北。一建鼓在西階之東。句南  
面。句蕩案在建鼓之間。鼗倚于頌磬西。鉉

此設樂也。宿縣先一夕。縣設鐘磬之屬。笙磬。笙與磬。

相次吹笙則鐘磬和之故謂笙磬笙鐘也笙生也列竹于匏象物生出地東爲生方故設于東階下東西面謂磬簾縮陳向西也南笙磬之南笙磬笙鐘小而編縣各十有六成一簾鑄大鐘特懸笙鐘與鑄其簾皆橫陳向南建鼓以木貫鼓腹植立卽楹鼓也在東階西與鑄并設南鼓鼓面向南應鼙小鼓樂作先擊朔鼙而應鼙應之然後擊大鼓故謂應鼙在建鼓東當建鼓與鑄之間亦縣設此以上設于堂下東者也頌誦通卽歌也歌則擊磬故謂頌磬頌以告成西成故列于西階下西東面其簾縮陳向東與笙磬對也

其南鐘謂小歌鐘其南鑄謂大鐘鐘鑄在頌磬南簾皆橫設南向與東階同建鼓言一所以殊于東者在其南又在鑄南其面向東也朔輦小鼓朔初也賓入樂初作則西擊輦西賓位樂由賓作也在其北在建鼓北亦懸設也又言一建鼓所以殊于西階西者此建于西階下東向南設也簫竹也簫管之屬在兩建鼓間鼗小鼓有耳有柄搖擊不懸設倚置于頌磬東絃鼗兩旁懸耳繩如冠之有絃鼗倚于磬簾東故其絃西委也

按東笙西頌皆列磬鐘東階之西西階之東列鼓輦

皆南向此卽周禮所謂諸侯軒懸者也鄭謂諸侯於其羣臣無三面非也又謂絃爲編磬之繩亦非也

厥明司宮尊于東楹之西兩方壺

句膳尊兩甒

句在南

句有豐

句

冪用錫若絺綴諸箭蓋

句

冪加勺又反之皆

玄尊

句

酒在北

句

尊士旅食于西鑄之南北面兩圓壺

又尊于大侯之左東北兩壺獻酒

句

設洗于阼階東南

罍水在東篚在洗西

句

南陳

句

設膳篚在其北西面又

設洗于獲者之尊西北水在洗北篚在南

句

東陳小臣

設公席于阼階上西鄉司宮設賓席于戶西南面有加

席卿席賓東東上小卿賓西東上大夫繼而東上若有



東面者則北上席工于西階之東東上諸公阼階西北面東上

此陳器設席也厥明設樂之明日卽射日之朝也兩方壺飲臣之尊膳尊君飲之尊兩甌卽膳尊甌小干壺膳尊在南方壺在北豐霽蓋勺皆膳尊也錫細布絺細葛以爲霽巾箭小竹爲尊蓋綴巾于上爲霽加勺霽上以餘巾反掩其勺皆玄尊謂兩方壺兩甌皆一水一酒也酒尊在北水尊在南南爲上貴玄酒也與燕禮尊儀互見士旅食者之尊鄉射設于門西旅食者立門西也大射較鄉射侯道遠逼近門旅食者

皆立堂下士南避射也故尊改設堂下西鑄之南尊  
北面人臣之義也兩圓壺皆酒也又設尊于大侯之  
東北以獻服不隸僕人巾車獲者之輩無玄尊故曰  
酒明所以設尊故曰獻所謂主人就旅食之尊而獻  
之者也洗設于阼階下東南罍水在洗東篚奠虛爵  
在洗西三物并陳皆南向膳篚奠君虛爵在洗北西  
向以君席在東也獲者之尊卽乏側之獻酒設洗以  
備獻獻酒在乏東北洗在尊西北水在洗北篚在洗  
南三物直陳皆東向以獲者在西也設席見燕禮卿  
上大夫小卿中大夫大夫下大夫賓以大夫爲之有

東面者大夫非一人也諸公謂孤卿餘見前

按鄭註獻酒作沙酒鑿也

官饌羹定射人告具于公公升卽位于席西鄉小臣師  
納諸公卿大夫諸公卿大夫皆入門右北面東上士西  
方東面北上大史在千侯之東北北面東上士旅食者  
在士南北面東上小臣師從者在東堂下南面西上公  
降立于阼階之東南南鄉小臣師詔揖諸公卿大夫諸  
公卿大夫西面北上揖大夫大夫皆少進大射正擯擯  
者請賓公曰命某爲賓擯者命賓賓少進禮辭反命又  
命之賓再拜稽首受命擯者反命賓出立于門外北面

公揖卿大夫句升就席小臣自阼階下北面請執筯者與羞膳者乃命執筯者執筯者升自西階立于尊南北面東上膳宰請羞于諸公卿者擯者納賓賓及庭公降一等揖賓賓辟避公升即席奏肆夏賓升自西階主人從之賓右北面至再拜賓答再拜

官饌官司具饌即前篇所謂膳宰具官饌也羹定肉熟也凡禮始羹定爲節射人告具以下多與燕禮同大史掌辭命立千侯東北北面者近君也及士旅食者在士南皆與燕禮殊以大侯道遠逼門故入庭深

■小臣師詔揖告公揖也不言適既入庭深也言揖

諸公卿大夫又言揖大夫者卿爲上大夫也。大射正射人之長擯爲擯相。命某爲賓。命大夫爲賓也。公揖卿大夫遂自升就席。卿大夫在庭也。羞膳者酌君尊者也。肆夏樂章名。餘解見燕禮。

按鄭以官饌屬上讀爲百官各饌具所當共之物。恐非。

主人降洗

句

洗南西北面賓降階西東面主人辭降賓

對

句

主人北面盥坐取觚洗賓少進辭洗主人坐奠觚

于篚興對賓反位主人卒洗賓揖乃升主人升賓拜洗

主人賓右奠觚答拜降盥賓降主人辭降賓對卒盥賓

揖升主人升坐取觥執冪者舉冪主人酌膳執冪者蓋  
冪酌者加勺又反之筵前獻賓賓西階上拜勺受爵于  
筵前反位主人賓右拜送爵宰胥薦脯醢賓升筵庶子  
設折俎賓坐左執觥右祭脯醢奠爵于薦右興取肺坐  
絕祭臍之興加于俎坐挽手執爵遂祭酒興席末坐啐  
酒降席坐奠爵拜告旨執爵興主人答拜樂闋勺賓西  
階上北面坐卒爵興坐奠爵拜執爵興主人答拜

此以下十一節皆將射而先燕飲之儀此一節主人  
獻賓也酌者加勺謂主人既酌酒以勺加冪上又反  
之謂執冪者舉餘巾反覆其勺也宰胥膳宰之屬庶

子司馬之屬樂闋謂自賓入奏肆夏至是乃止闋止也。卽燕記云賓拜酒主人答拜而樂闋是也。賓入奏肆夏以西方之縣也。

賓以虛爵降主人降賓洗南西北面坐奠觚少進辭降主人西階西東面少進句對賓坐取觚奠于篚下盥洗主人辭洗賓坐奠觚于篚興對句卒洗及階揖升主人升拜洗如賓禮賓降盥主人降賓辭降卒盥揖升酌膳執冪如初以酢主人于西階上主人北面拜受爵賓主人之左拜送爵主人坐祭不啐酒不拜酒遂卒爵興坐奠爵拜執爵興賓答拜主人不崇酒以虛爵降奠于

筐賓降立于西階西東面擯者以命升賓賓升立于西序東面

此賓酢主人解見燕禮主人西階西者從賓降暫立于此擯者以命以君命也

主人盥洗象觚升酌膳東北面獻于公公拜受爵乃奏肆夏主人降自西階阼階下北面拜送爵宰胥薦脯醢由左房庶子設折俎升自西階公祭如賓禮庶子贊授肺不拜酒立卒爵坐奠爵拜執爵興主人答拜樂闋升受爵降奠于筐更爵洗升酌散以降酢于阼階下北面坐奠爵再拜稽首公答拜主人坐祭遂卒爵興坐奠爵



再拜稽首。公答拜。主人奠爵于篚。

此主人獻君自酢解見燕禮。奏肆夏卽燕記云。公拜受爵而奏肆夏。公卒爵。主人升受爵以下而樂闕是也。君受爵奏肆夏以東方之縣也。左房東房也。凡堂上之薦皆由左房出。折俎折牲脊脅臂肺爲君俎。自西階升。鼎由外入也。燕禮酌膳此酌散燕禮主飲故叨君惠大射主禮不敢同于尊也。

主人盥洗升。媵觚于賓。酌散西階上坐奠爵拜。句賓西階上北面答拜。主人坐祭遂飲。句賓辭。句卒爵興坐奠爵拜。執爵興賓答拜。主人降洗賓降。主人辭降賓辭洗。

卒洗賓揖升不拜洗主人酌膳賓西階上拜受爵于筵  
前友位主人拜送爵賓升席坐祭酒遂奠于薦東主人  
降復位賓降筵西東南面立

此主人酬賓也解見燕禮

小臣自阼階下請媵爵者公命長句小臣作下大夫二  
人媵爵媵爵者阼階下皆北面再拜稽首公答拜媵爵  
者立于洗南西面北上序進盥洗角解升自西階序進  
酌散交于楹北降適阼階下皆奠解再拜稽首執解興  
公答拜媵爵者皆坐祭遂卒解興坐奠解再拜稽首執  
解興公答再拜媵爵者執解待于洗南小臣請致者若

命皆致則序進奠觶于筐阼階下皆北面再拜稽首公  
答拜。媵爵者洗象觶升賓之序進坐奠于薦南北上降  
適阼階下皆再拜稽首送觶。公答拜。媵爵者皆退反位。  
此下大夫二人媵爵爲君舉旅之始解見燕禮燕禮  
公皆答再拜。此或云公答拜者答一拜也。媵爵者退  
反位。反庭中北面之位。

按大夫初與卿皆入門右北面及公揖卿西面北上  
揖大夫少進則大夫北面進至庭中矣。鄭云反門右  
北面之位非也。大侯道遠逼門史與旅食輩既皆不  
在門而二大夫獨立門右乎。

公坐取大夫所饔餼興以酬賓賓降西階下再拜稽首  
小臣正辭賓升成拜公坐奠酬答拜執餼興公卒餼賓  
下拜小臣正辭賓升再拜稽首公坐奠餼答拜執餼興  
賓進受虛餼降奠于篚易餼興洗公有命則不易不洗  
反升酌膳下拜小臣正辭賓升再拜稽首公答拜賓告  
于擯者句請旅諸臣句擯者告于公公許賓以旅大夫  
于西階上擯者作大夫長升受旅賓大夫之右坐奠餼  
拜執餼興大夫答拜賓坐祭立卒餼不拜若膳餼也則  
降更餼洗升實散大夫拜受賓拜送遂就席大夫辯句  
受酬如受賓酬之禮不祭酒卒受者以虛餼降奠于篚

# 復位

此公初爲賓舉旅解見燕禮賓告于擯者請旅謂賓請旅于君擯者降西階往阼階下北面請于君君許擯者于西階上復于賓而後作大夫長升受旅云旅大夫該公卿也大夫長卽卿升受旅時卿大夫皆在庭卒受者下大夫也復位復庭下北面之位

主人洗觚升實散獻卿於西階上司宮兼卷重席設於賓左東上卿升拜受觚主人拜送觚卿辭重席司宮徹之乃薦脯醢卿升席庶子設折俎卿坐左執爵右祭脯醢奠爵于薦右興取肺坐絕祭不啻肺興加于俎坐稅

傳禮記集說卷之十一  
手取爵遂祭酒執爵興降席西階上北面坐卒爵興坐  
奠爵拜執爵興主人答拜受爵卿降復位辯獻卿主人  
以虛爵降奠于篚損者升卿卿皆升就席若有諸公則  
先卿獻之如獻卿之禮席于阼階西北面東上無加席  
此主人獻諸公卿解見燕禮燕禮獻卿無折俎大射  
盛于燕也不啻肺事主射自貶于賓也

小臣又請媵爵者句二大夫媵爵如初請致者若命長  
致則媵爵者奠解于篚一人待于洗南長致者阼階下  
再拜稽首公答拜洗象解升賓之坐奠于薦南降與立  
于洗南者二人皆再拜稽首送解公答拜公又行一爵

若賓若長唯公所賜以旅于西階上如初大夫卒受者以虛觶降奠于篚

此再勝爵于君君再舉旅解見燕禮

主人洗觶升獻大夫于西階上大夫升拜受觶主人拜送觶大夫坐祭立卒爵不拜既爵主人受爵大夫降復位胥薦主人于洗北西面脯醢無胥辨獻大夫遂薦之繼賓以西東上若有東面者則北上卒句擯者升大夫大夫皆升就席

此主人獻大夫解見燕禮

乃席工于西階上少東小臣納工工六人四瑟句僕人

正徒相太師。句僕人師相少師。僕人士相上工。相者皆左何瑟。後首。內弦。挾越。右手相。句後者徒相。句入。句小樂正從之。升自西階。北面東上。坐授瑟。乃降。小樂正立于西階東。乃歌鹿鳴三終。主人洗。升實爵。獻工。工不興。句左瑟。句一人拜受爵。主人西階上拜送爵。薦脯醢。使人相祭。卒爵不拜。主人受虛爵。衆工不拜受爵。坐祭。遂卒爵。辯有脯醢。不祭。主人受爵。降奠于篚。復位。太師及少師上工皆降。立于鼓北。羣工陪于後。乃管新宮三終。卒管。太師及少師上工皆東。圻之東南。西面北上坐。此三獻畢。樂作。主人獻工。解見燕禮。工六人。謂太師。



少師與上工四人四瑟樂盛于燕也僕人正僕人之長徒相不荷樂器空手扶之僕人師正之貳也相少師亦徒相也僕人士正之吏也上工堂上歌工相上工者四人皆左荷瑟右手相四工前行相太師少師居後故曰後者徒相授瑟相者授也乃降降西階小樂正立西階東立階上也獻工解見燕禮主人受爵降復位復東階下洗北西面之位樂先升歌歌畢二師四工皆降席立于西階下東建鼓之北太師立與鼓齊少師及四工皆陪立于後以俟奏管管蕭屬前所設簫也新宮樂章名三終奏三曲畢歌工六人遷

于東坫東南西向坐北上以次而南也坫堂下閣物處冠禮有西坫是堂東西皆有坫也

擯者自阼階下請立司正公許擯者遂爲司正司正適洗洗角觶南面坐奠于中庭升東楹之東受命于公西階上北面命賓諸公卿大夫公曰以我安賓諸公卿大夫皆對曰諾敢不安司正降自西階南面坐取觶升酌散降南面坐奠觶興右還北面少立坐取觶興坐不祭卒觶奠之興再拜稽首左還南面坐取觶洗南面反奠于其所北面立

此將旅立司正以監之擯者卽大射正解見燕禮

按燕禮立司正安賓遂徹俎坐燕其情文稱今射尚未舉遂致終燕之辭似此禮專爲燕而射事反輕君始戒百官以射諸臣爲射來所命與所戒不相背與且司正方洗解司射忽請射少次第蓋本燕與大射二禮割湊成文知是書非盡禮經之舊矣

司射適次袒決遂執弓挾乘矢於弓外見鏃於弣右巨指鉤弦自阼階前曰爲政請射遂告曰大夫與大夫士御於大夫

此始請射也司射卽射人次謂設帷障爲更衣之次在東堂下洗東南周禮天官掌次所謂射則張耦次

是也。挾乘矢於弓外，謂左手執弓弣，右手橫夾四矢於二指間，以大指鉤弦，則矢鏃橫見於弣外。自阼階前，稟命于君也。爲政，謂司馬周禮司馬掌邦政，遂告告選三耦，大夫與大夫爲耦，不足以士耦於大夫御，猶侍也。

遂適西階前，東面。右顧，命有司納射器。射器皆入。君之弓矢適東堂，賓之弓矢與中籌豐皆止于西堂下。衆弓矢不挾，總衆弓矢，福皆適次而俟。工人士與梓人升自北階，兩楹之間，疏數容弓。若丹若墨，度尺而午，射正蒞之。卒畫自北階下。司宮埽所畫物，自北階下。大史俟于

所設中之西。東面以聽政。司射西面誓之曰。公射大侯。大夫射參。士射干。射者非其侯。中之不獲。卑者與尊者。爲耦。不異侯。大史許諾。遂比三耦。三耦俟于次北。西面北上。司射命上射曰。某御於子。命下射曰。子與某子射。卒。遂命三耦取弓矢于次。

此納射器。畫物比耦。司射既阼階前請射。遂適西階前。東面立。有司司射器者皆士也。亦立西階南東面。故司射右顧而命之。君弓矢適堂上。東賓弓矢與中。籌豐皆納堂下西。衆弓矢與福納堂下東南。次內各近其所也。衆弓矢不挾多故也。總謂束縛之工人士。

工作之官。梓人木工爲侯者。北階。堂後階。兩楹之間。謂堂中也。鄉射記云。堂深則當楣是也。疏數猶廣狹。容弓。謂兩物間相去六尺。若丹若墨。隨用一色。畫地爲物。射者所立也。物以尺爲度。一縱一橫曰午。蒞臨視也。埽埽畫處使分明。大史掌釋獲者。中設堂下。西當西序。南當福。大史初立侯。東北面。今立中西東面。聽司射誓也。時司射立西階前東面。轉向大史誓之。君與賓耦。同射。大侯。士與大夫耦。同射。參侯。卑者與尊者耦。卽與尊者同侯。亦如士與士耦。同射。干侯也。比配也。三耦始誘射。皆士。次在堂下東。士立次外之。

北西向以俟北上序立而南也鄉射三耦立堂西此立堂東者射器在東大射統于君也鄉射器在西統于賓也故鄉射卽謂之賓射可也大射用燕禮卽謂之燕射亦可也

按周禮射人職云王射三侯六耦諸侯二侯四耦大夫一侯三耦今諸侯用三侯三耦與周禮異

司射入于次搢三挾一个出于次西面揖當階北面揖及階揖升堂揖當物北面揖及物揖由下物少退誘射射三侯將乘矢始射干又射參大侯再發卒射北面揖及階揖降如升射之儀遂適堂西改取一个挾之遂取

扑搯之以立于所設中之西南東面

此司射誘射解見鄉射入次取弓矢也堂下三揖堂上三揖升降同也由下物自左物射也少退避君位也君立下物卒射北面揖敬君事殊于鄉射揖南面也設中之西南東面卽鄉射司馬北西面之位餘解見鄉射

按大射衆弓矢皆總入于東次司射適堂西改取一个豈堂西賓之弓矢外別有矢與不然則適次之誤也

司馬師命負侯者執旌以負侯負侯者皆適侯執旌負



侯而俟。司射適次，作上耦射。司射反位，上耦出次，西面揖進。上射在左，并行。當階北面揖。及階，揖。上射先升三等，下射從之。中等，上射升堂，少左，下射升。上射揖并行，皆當其物北面揖。及物，揖。皆左足履物，還旋視侯中，合足而俟。司馬正適次，袒決遂執弓，右挾之出，升自西階，適下物，立于物間。左執弣，右執簫，南揚弓，命去侯。負侯皆許。句諾以宮。句趨直西，及乏南，又諾以商。句至乏聲止。授獲者，退立于西方。獲者興，共而俟。司馬正出于下射之南，還其後，降自西階，遂適次。釋弓說脫，決拾襲反位。司射進，與司馬正交于階前，相左，由堂下西階之東。

北面視上射命曰毋射獲毋獵獲上射揖司射退反位  
乃射上射既發挾矢而后下射射拾發以將乘矢獲者  
坐而獲舉旌以宮偃旌以商獲而未釋獲卒射右挾之  
北面揖揖如升射上射降三等下射少右從之中等并  
行上射於左與升射者相左交于階前相揖適次釋弓  
說決拾襲反位三耦卒射亦如之司射去扑倚于階西  
適阼階下北面告于公曰三耦卒射反摺扑反位

此三耦誘射解見鄉射司馬師司馬正之佐負侯  
者卽獲者鄉射惟一人大射卽周禮夏官服不氏以  
旌居之待獲士一人徒四人士負大侯徒負二侯也

旌謂翻旌。鄉飲記云：君射以翻旌獲，三侯三人三旌。故皆適侯。司射適次自西適東也。三耦俱在次北西面立。司射往東面作之。反位。反中、西南、東面之位。上射在左，升堂以西爲左。趨右，物便也。視侯中，各視其所射侯之鵠。司馬適下物，由上射後過至下射西南立。于兩物間與鄉射同。兩手揚弓以命，負侯者與鄉射以右手異。宮聲大，商聲小。乏在各侯西北。負侯者直趨西，當乏之南。又趨北，不徑趨西北。大射禮嚴也。授獲者服，不氏至，乏以旌授其徒。居乏報獲而身退立于西方。蓋大侯服不氏親負其徒，一人代居乏。參侯

千侯則各一徒負侯居之不相代也司馬正反位反  
千司射立之南與鄉射同卒射右挾之謂矢發盡左  
手執弓右手大二指挾弓弦就物內轉向北揖異于  
鄉射揖南面也射者反位反于次北西面北上之位  
餘解見鄉射

司馬正袒決遂執弓右挾之出與司射交于階前相左  
升自西階自右物之後立于物間西南面揖弓命取矢  
負侯許諾如初去侯句皆執旌以負其侯而俟司馬正  
降自西階北面命設福小臣師設福司馬正東面以弓  
爲畢既設福司馬正適次釋弓說決拾襲反位小臣坐

委矢于楅。北括司馬師坐乘之卒。若矢不備則司馬正又袒執弓升命取矢如初曰取矢不索乃復求矢加于楅。卒司馬正進坐左右撫之興反位。

此將正射設楅委矢也。執弓右挾右手挾弓弦也。司馬正北面命設楅亦猶鄉射立于所設楅之南設楅中庭南與洗齊故司馬正北面立其南使設者止勿過南也。小臣師設楅司馬正又轉西東面立使設者勿偏西也。畢竹簡筭類形如畢星卽今如意執以止物曰畢與蹕通止也。臣當君前不敢指撝故以弓當筭止其處乘矢不備則師以告正正復命取矢備則

正撫而數之餘解見鄉射

司射適西階西倚扑升自西階東面請射于公公許遂  
適西階上命賓御于公諸公卿則以耦告于上句大夫  
則降卽位而后告司射自西階上北面告于大夫曰請  
降司射先降搢扑反位大夫從之降適次立于三耦之  
南西面北上司射東面于大夫之西比耦句大夫與大  
夫句命上射曰某御於子命下射曰子與某子射卒遂  
比衆耦衆耦立于大夫之南西面北上若有士與大夫  
爲耦則以大夫之耦爲上命大夫之耦曰子與某子射  
告於大夫曰某御於子命衆耦如命三耦之辭諸公卿

皆未降

此將射比耦也。司射此請必升堂者。將徧告賓諸公卿大夫也。命賓御于公。以君命命也。君與賓爲耦射。大侯公卿爲耦射。參侯大夫士爲耦射。于侯諸公卿之耦。卽堂上比而告之。尊故不俟降射位告也。大夫則降適次。往堂東。立于三耦南。三耦立于次北。大夫之上將先射也。司射東面向大夫也。大夫與大夫謂多則同耦也。卒。謂比公賓卿大夫耦畢。遂比衆耦衆耦士也。士若有爲大夫之耦者。則立衆士上。大國諸侯臣一孤三卿五大夫三耦。自有餘。而時或有與有

不與故大夫不足則以士比之餘解見鄉射

遂命三耦各與其耦拾取矢皆袒決遂執弓右挾之一耦出西面揖當楅北面揖及楅揖上射東面下射西面上射揖進坐橫弓卻手自弓下取一个兼諸射興順羽且左還旋毋周反面揖下射進坐橫弓覆手自弓上取一个兼諸射興順羽且左還旋毋周反面揖既拾取矢楅之兼挾乘矢皆內還南面揖適楅南皆左還北面揖搯三挾一个揖以耦左還上射於左退者與進者相左相揖退釋弓矢于次說決拾襲反位二耦拾取矢亦如之後者遂取誘射之矢兼乘矢而取之以授有司于次



中皆襲反位

此將射三耦取矢于楅解見鄉射三耦各與其耦謂各上射與下射也執弓右挾之挾弦也及楅上射立楅西東面下射立楅東西面遞進取矢如鄉射順羽謂楅直設矢羽在北以左體轉向南羽順在北也毋周謂纔轉向南卽轉向東反面揖謂反原位東面揖下射使進也下射左還毋周纔轉向北卽轉向西揖上射使更進也與鄉射周還異鄉射禮貴從容大射嚴疾楅叩也叩四矢使齊也皆內還謂上射左下射右皆內向楅轉就本位南面揖并行適楅南二人皆

左還由西面轉向北揖搯挾矢與鄉射同以與也上射與下射將東適次二人并左還則上射轉居北下射轉居南上射於左東行北爲左也餘詳鄉射按禮事多尚左左爲陽生物之主鄭以左還爲不背君鑒也

司射作射如初一耦揖升如初司馬命去侯負侯許諾如初司馬降釋弓反位司射猶挾一个去并與司馬交于階前適阼階下北面請釋獲于公公許反搯扑遂命釋獲者設中以弓爲畢北面大史釋獲小臣師執中先首坐設之東面句退大史實八筭于中橫委其餘

于中西興共而俟司射西面命曰中離維綱揚觸相復  
公則釋獲衆則不興唯公所中中三侯皆獲釋獲者命  
小史小史命獲者司射遂進由堂下北面視上射命曰  
不貫不釋上射揖句司射退反位釋獲者坐取中之八  
筭改實八筭興執而俟乃射若中則釋獲者每一個釋  
一筭上射於右下射於左若有餘筭則反委之又取中  
之八筭改實八筭于中興執而俟三耦卒射

此三耦正射解見鄉射以弓爲畢止其設中之所鄉  
射禮云南當楅西當西序以弓爲畢止其地也北面  
示設中者不得過南也大史釋獲大射釋獲者大史

也。史掌書記筭法。故主獲。小臣執中。以首向前。首在東也。大史與小臣退。中西東面立。司射西向。大史命以釋獲之法。中謂矢著侯。離附麗也。侯舌曰維。繫侯繩曰綱。揚觸矢。觸地揚起。摑叩也。復反也。矢叩侯還反于地。如此者。唯君射爲釋獲。衆皆不筭。君射不拘。大侯參侯干侯。中皆釋獲。衆射非其侯。中不筭。大史以此告小史。小史以告獲者。傳司射所命也。餘見鄉射。

賓降取弓矢于堂西。諸公卿則適次。繼三耦以南。公將射。則司馬師命負侯。皆執其旌以負其侯。而侯司馬師

反位。隸僕人埽侯道。司射去扑。適阼階下。告射于公。公許。適西階東。告于賓。遂搢扑反位。小射正一人取公之決。拾於東坫上。一小射正授弓拂弓。皆以俟于東堂。公將射。則賓降。適堂西。袒決。遂執弓。搢三挾一个。升自西階。先待于物北。北一筈。東面立。司馬升命去侯如初。還右乃降。釋弓反位。公就物。小射正奉決。拾以筈。大射正執弓。皆以從於物。小射正坐奠筈于物南。遂拂以巾。取決興贊。設決。朱極三。小臣正贊袒。公袒。朱襦。卒袒。小臣正退。俟于東堂。小射正又坐取拾興贊。設拾以筈。退奠于坫上。復位。大射正執弓以袂順左右。展上。再下。壹。左。

執弣右執簫以授公公親操之小臣師以巾內拂矢而授矢于公稍屬大射正立于公後以矢行告于公下曰畱上曰揚左右曰方公既發大射正受弓而俟拾發以將乘矢公卒射小臣師以巾退反位大射正受弓小射正以筈受決拾退奠于坫上復位大射正退反司正之位小臣正贊襲公還而后賓降釋弓于堂西反位于階西東面公卽席司正以命升賓賓升復筵而后卿大夫繼射諸公卿取弓矢于次中袒決遂執弓搯三挾一个出西面揖揖如三耦升射卒射降如三耦適次釋弓說決拾襲反位衆皆繼射釋獲皆如初

此君及賓卿大夫士正射賓與君爲耦君將射賓先  
自堂上西序東面降立階西東面也初納射器賓弓  
矢在堂西諸臣弓矢在東次故賓適堂西諸公卿適  
次各取弓矢三耦以南謂大夫立之北司馬師及位  
位在西階下東面司馬正之南也隸僕人周禮司隸  
之屬埽侯道君將射新之也司射適西階東告賓賓  
立西階下西東面君將射賓爲耦故告也埽以閣物  
在堂上東小射正授弓授之大射正大射正以授公  
拂拭使潔也東堂堂上東君席側也賓降卽前取弓  
矢降再言以明待君之儀疏謂取弓矢升再降非也

物北右物之北離一筭不敢先就物也東面立向君待也司馬命去侯還右乃降者賓物居右司馬出右物南卽西轉下堂不還左物時君未就物也贊設決爲君設也朱極以朱韋韜右手指利弦三謂食指將指無名指三各用一也小射正復位與小臣正同立俟于東堂也袂衣袖順卽拂也隈弓曲處以衣袖順弓上下兩隈拂之示整潔也弓仰執故上隈之裏左右再拂下隈之背一拂之左手承弓把右手捉弓梢授君君受而親揉之審其安危也小臣師以巾內拂矢使塵向已也稍屬奉矢稍稍相繼屬不絕也大射



正立當君後望矢道以詔君不及曰留大高曰揚旁  
出曰方左曰左方右曰右方也君爲下射賓爲上射  
各四矢亦拾發上射旣發挾矢而后下射發與初三  
耦同但君不親執弓侯每旣發一矢大射正爲君執  
弓侯賓旣發挾矢又授君弓公卒射賓退立物北東  
面侯公釋弓矢說決拾襲衣而後降大射正退反中  
庭解南司正之位公旣襲還東階賓乃降釋射器反  
升立于階西東面之位君立于阼階席上司正乃命  
賓升戶西南面之位然後諸公卿大夫衆耦相繼升  
射降皆反于次北東面之位侯司馬命取矢而後升

也釋獲皆如初。通君賓公卿大夫衆耦而言。

按司射反司正之位當在三射畢釋獲者退中與筭之後此文誤也。以袂順左右隈鄭氏謂以袂順放之非也。此節叙君射過自矜貴多棄世驕蹇之風。乏先王恭儉之意。人主既身居下物折節行禮過自矜飾何以誨下。至于三射樂作然後就物不以樂志則所稱節奏比禮容體比樂者君獨不然。焉用射君不用禮樂而能選士御臣者未之有也。孟子曰責難於君謂之恭吾君不能謂之賊今之大夫今之諸侯之罪人亦此類。

卒射釋獲者遂以所執餘獲適阼階下北面告于公曰  
左右卒射反位坐委餘獲于中西興共而俟司馬袒執  
弓升命取矢如初負侯許諾以旌負侯如初司馬降釋  
弓如初小臣委矢于楅如初賓諸公卿大夫之矢皆異  
束之以茅卒正坐左右撫之進束反位賓之矢則以授  
夫人于西堂下司馬釋弓反位而后鄉大夫升就席司  
射適階西釋弓去扑襲進由中東立于中南北面視筭  
釋獲者東面于中西坐先數右獲二筭爲純一純以取  
實于左手十純則縮而委之每委異之有餘純則橫諸  
下一筭爲奇奇則又縮諸純下興自前適左東面坐坐

兼斂筭實于左手一純以委十則異之其餘如右獲司  
射復位釋獲者遂進取賢獲執之由阼階下北面告于  
公若右勝則曰右賢於左若左勝則曰左賢於右以純  
數告若有奇者亦曰奇若左右鈞則左右各執一筭以  
告曰左右鈞還復位坐兼斂筭實八筭于中委其餘于  
中西興共而俟

此正射畢取矢筭獲解見鄉射賓諸公卿大夫矢皆  
異束之者小臣取矢卽束之也卒取矢畢正謂司馬  
正左右撫之數衆矢也進束謂旣數衆矢而后進所  
束之矢于福反位及中西南東面之位賓矢授矢人

于西堂下不委于福也不言君失其以授小臣于東堂可知司馬釋弓反位卽前降釋弓再言以明小臣取矢時卿大夫已升就席也餘見鄉射

按鄭解進束謂整結之示親非也

司射命設豐司宮士奉豐由西階升北面坐設于西楹西降復位勝者之弟子洗解升酌散南面坐奠于豐上降反位司射袒執弓挾一个摺扑東面于三耦之西命三耦及衆射者勝者皆袒決遂執張弓不勝者皆襲說決拾卻左手右加弛弓于其上遂以執弣司射先反位三耦及衆射者皆升飲射爵于西階上小射正作升飲

射爵者如作射一耦出揖如升射及階勝者先升升堂少右不勝者進北面坐取豐上之觶興少退立卒觶進坐奠于豐下興揖不勝者先降與升飲者相左交于階前相揖適次釋弓襲反位僕人師繼酌射爵取觶實之反奠于豐上退俟于序端升飲者如初三耦卒飲若賓諸公卿大夫不勝則不降不執弓耦不升僕人師洗升實觶以授賓諸公卿大夫受觶于席以降適西階上北面立飲卒觶授執爵者反就席若飲公則侍射者降洗角觶升酌散降拜公降一等小臣正辭賓升再拜稽首公答再拜賓坐祭卒爵再拜稽首公答再拜賓降洗象

解升酌膳以致下拜。小臣正辭。升再拜稽首。公答再拜。公卒解。賓進受解。降洗散解。升實散。下拜。小臣正辭。升再拜稽首。公答再拜。賓坐。不祭。卒解。降奠于篚。階西東面立。擯者以命升。賓升就席。若諸公卿大夫之耦不勝。則亦執弛弓。特升飲。衆皆繼飲射爵。如三耦射爵辯。乃撤豐與解。

此正射飲不勝者。解見鄉射。司宮士。司宮之屬。其位與士共立于西方東面。小射正作升飲者。司射但命其儀。不親作。與鄉射異。僕人。師繼酌。代弟子也。猶鄉射之有執爵者。侍射者。卽賓公之耦也。飲君不敢同。

衆爲媵爵之禮。君飲一，臣飲二，賓先洗角，解酌散，自飲導君。君既飲，復酌散，自飲，所謂夾爵也。燕記：若飲君如燕，則夾爵是也。諸公之耦，不勝，謂士之爲大夫耦者也。餘解見鄉射。

司宮尊侯于服不之東北，兩獻酒，東面南上，皆加勺。設洗于尊西北，篚在南。東肆，實一散于篚。司馬正洗散，遂實爵獻服。不服，不侯。西北三步，北面拜受爵。司馬正西面拜送爵。反位。宰夫有司薦。句庶子設折俎。卒錯。句獲者適右个。句薦俎從之。獲者左執爵，右祭薦俎，二手祭酒。適左个，祭如右个。中亦如之。卒祭左个之西北三步。



東面設薦俎立卒爵司馬師受虛爵洗獻隸僕人與巾  
車獲者皆如大侯之禮卒司馬師受虛爵奠于筐獲者  
皆執其薦庶子執俎從之設于乏少南服不復負侯而  
俟司射適階西去扑適堂西釋弓說決拾襲適洗洗觚  
升實之降獻釋獲者于其位少南薦脯醢折俎皆有祭  
釋獲者薦右東面拜受爵司射北面拜送爵釋獲者就  
其薦坐左執爵右祭脯醢興取肺坐祭遂祭酒興司射  
之西北面立卒爵不拜既爵司射受虛爵奠于筐釋獲  
者少西辟薦反位司射適堂西袒決遂取弓挾一个適  
階西搢扑以及位

此正射畢而獻服不巾車獲者與釋獲者尊侯設獻  
尊于侯也服不官名負大侯者服不去侯居之尊設  
于之東北兩獻酒及勺洗籠卽初陳設者散爵類實  
五升司馬洗散實爵卽實以獻酒也之在侯西北各  
十步設尊近之受爵近侯爵因侯得將祭侯故近侯  
受獻宰夫有司宰夫之吏也薦與俎皆爲服不也錯  
奠也錯薦俎于地卒畢也獲者卽服不右手祭薦畢  
復共左手執散祭酒散大故須二手左右中解見鄉  
射隸僕人埽侯道巾車張三侯獲者參侯于侯之獲  
者服不之屬也不言量人同可知也參侯于侯皆有

薦俎其獲者皆執其薦俎設于乏南三祭同也于乏南各近侯也服不負大侯而侯侯三射也其二侯之獲者皆負侯亦可知司射獻釋獲者大史也大史釋筭而秩貴于服不故酌堂上之尊釋獲與司射之位皆在中西東面少南避中也餘解見鄉射

按兩獻尊卽篇首初設之尊鄭謂不於初獻設之者不敢必君射非也獻卽獻服不鄭讀作沙迂也

司射倚扞于階西適阼階下北面請射于公如初反扞扞適次命三耦皆袒決遂執弓序出取矢司射先反佐三耦拾取矢如初小射正作取矢如初三耦旣拾取矢

諸公卿大夫皆降如初位句與耦入於次皆袒決遂執  
弓皆進當楅進坐說矢束上射東面下射西面拾取矢  
如三耦若士與大夫為耦士東面大夫西面大夫進坐  
說脫矢束退反位耦揖進坐兼取乘矢興順羽且左還  
毋周反面揖大夫進坐亦兼取乘矢如其耦北面揖三  
挾一个揖進大夫與其耦皆適次釋弓說決拾襲反位  
諸公卿升就席衆射者繼拾取矢皆如三耦遂入于次  
釋弓矢說決拾襲反位

此終射取矢于楅解見鄉射公卿大夫皆降如初位  
謂適次北繼三耦以南之位也諸公卿大夫自相為

耦則拾取夫如三耦若士與大夫爲耦則士兼取乘  
矢不敢與大夫拾餘見鄉射

司射猶挾一个以作射如初一耦揖升如初司馬升命  
去侯負侯許諾司馬降釋弓反位司射與司馬交于階  
前倚扑于階西適阼階下北面請以樂于公公許司射  
反搯扑東面命樂正曰命用樂樂正曰諾司射遂適堂  
下北面眡上射命曰不鼓不釋上射揖司射退反位樂  
正命大師曰奏貍首聞若一大師不興許諾樂正反位  
奏貍首以射三耦卒射賓待于物如初公樂作而后就  
物稍屬不以樂志其他如初儀卒射如初賓就席諸公

卿大夫衆射者皆繼射釋獲如初卒射降反位釋獲者執餘獲進告左右卒射如初

此終射樂作解見鄉射。眡視同。麋首樂章名。麋之言不來也。卽射義曾孫侯氏之詩取射諸侯首不來朝之義。賓待于物。謂三耦射畢。君將射。賓先立物後待君也。稍屬不以樂志。謂君射發矢稍稍繼續不以樂爲節。志猶記也。卒射降反位。謂衆耦繼射者降反次北之位。

按鄭云始射獲而未釋獲復釋獲復用樂行之。君子之於事始取能中課有功終用成法教化之漸也。射

用應樂爲難。此義得之中庸曰。發而皆中節謂之和。故達于射者。可與言性情矣。狸首不來之說。未足據。豈諸侯亦以不寧侯自射乎。必若所云。惟天子射狸首耳。

司馬升命取矢。負侯許諾。司馬降釋弓反位。小臣委矢。司馬師乘之。皆如初。司射釋弓視筭如初。釋獲者以賢。獲與鈞告如初。復位。司射命設豐實。解如初。遂命勝者執張弓。不勝者執弛弓。升飲如初。卒。退。豐與解如初。此終射畢。取矢筭獲。罰飲不勝也。解見鄉射。

司射猶袒決遂。左執弓。右執一个。兼諸弦面。鏃適次命。

拾取矢如初。司射反位。三耦及諸公卿大夫衆射者皆袒決遂以拾取矢如初。矢不挾兼諸弦面鏃退適次。皆授有司弓矢。句襲反位。卿大夫升就席。司射適次釋弓說決。拾去扑襲反位。司馬正命退。楅解綱。小臣師退。楅巾車量人解左下綱。司馬師命獲者以旌與薦俎。退。司射命釋獲者退中與筭而俟。

此射畢。授射器于有司。解見鄉射。諸公卿大夫射畢升就席。則士亦反西方之位矣。

公又舉奠觶。唯公所賜。若賓若長。以旅于西階上如初。大夫卒受者。以虛觶降。奠于篚反位。司馬正升自西階。



東楹之東。北面告于公。請徹俎。公許。遂適西階上。北面告于賓。賓北面取俎以出。諸公卿取俎如賓禮。遂出授從者于門外。大夫降復位。庶子正徹公俎。降自阼階以東。賓諸公卿皆入門。東面北上。司正升賓。賓諸公卿大夫皆說屨。升就席。公以賓及卿大夫皆坐。乃安羞。庶羞大夫祭薦。司正升受命。皆命公曰。衆無不醉。賓及諸公卿大夫皆興。對曰。諾。敢不醉。皆反位坐。

此君三舉旅。徹俎以燕也。君初旅爲賓。再旅爲公卿。三旅爲大夫。燕禮皆旅于未立。司正前禮主射。故遲至此。前君射節。大射正退反。司正之位九字。當移置

此節之首司馬正升自西階當作司正多一馬字公卿取俎如賓禮謂皆親徹俎以出從者不敢入路門也大夫無俎亦降將同賓公卿脫屨升也餘解見鄉射

主人洗酌獻士于西階上士長升拜受觶主人拜送士坐祭立飲不拜既爵其他不拜坐祭立飲乃薦司正與射人于解南北面東上司正爲上辯獻士士既獻者立于東方西面北上乃薦士祝史小臣師亦就其位而薦之主人就士旅食之尊而獻之旅食不拜受爵坐祭立飲主人執虛爵奠于篚復位

此主人獻士也。解見燕禮。

按燕禮重飲。故旅大夫獻士而后射。大射重射。故射畢而后旅大夫獻士。

賓降洗。升。媵解于公。酌散下拜。公降一等。小臣正辭。賓升。再拜稽首。公答再拜。賓坐。祭卒爵。再拜稽首。公答再拜。賓降洗。象觚升。酌膳坐奠于薦南。降拜。小臣正辭。賓升成拜。公答拜。賓反位。

此賓媵解于公也。賓反位不言降者。自堂上反戶西席。餘解見燕禮。

公坐取賓所媵觚興。唯公所賜受者如初受酬之禮。降。

更爵洗升酌膳下再拜稽首小臣正辭升成拜公答拜  
乃就席坐行之有執爵者唯受于公者拜司正命執爵  
者爵辯卒受者興以酬士句大夫卒受者以爵興西階  
上酬士士升大夫奠爵拜士答拜大夫立卒爵不拜實  
之士拜受大夫拜送士旅于西階上辯句士旅酌  
此君四舉旅徧及士也解見燕禮

若命曰復射則不獻庶子司射命句射唯欲句卿大夫  
皆降再拜稽首公答拜壹發句中三侯皆獲

此坐燕復射也庶子解見燕禮燕禮旅士徧則主人  
獻庶子若君有命復射則宜于旅士畢未獻庶子之

先司射命以君命也射唯欲不欲者聽也卿大夫皆降射與不射皆降拜君命也公不辭以賓不與也賓不與以賓爲君耦不敢拜唯欲之命也壹發惟發壹矢中三侯皆釋獲以一矢獲難也旣釋獲則不獲者罰飲可知

主人洗升自西階獻庶子于阼階上如獻士之禮辯獻降洗遂獻左右正與內小臣皆於阼階上如獻庶子之禮

此主人獻庶子左右正內小臣解見燕禮

無筭爵士也有執膳爵者有執散爵者執膳爵者酌以

進公。公不拜受。執散爵者酌以之。公命所賜所賜者興受爵降席下奠爵再拜稽首。公答再拜受賜爵者以爵就席坐。公卒爵然後飲。執膳爵者受公爵酌反奠之。受賜者興授執散爵者。執散爵者乃酌行之。唯受于公者拜。卒爵者興以酬士于西階上。士升大夫不拜乃飲。實爵士不拜受爵。大夫就席士旅酌亦如之。公有命徹簾則賓及諸公卿大夫皆降西階下北面東上再拜稽首。公命小臣正辭。公答拜。大夫皆辟升反位。士終旅於上如初。無算樂。賓則庶子執燭於阼階上。司宮執燭於西階上。甸人執大燭於庭。閭人爲燭於門外。賓酢北面。

坐取其薦脯以降奏陔賓所執脯以賜鐘人于門內雷遂出卿大夫皆出公不送公入鵲

此終燕無筭爵賓醉出也解見燕禮公入退適內也鵲樂名九夏之一公退則奏鵲夏燕禮無鵲殺也

按鄭謂燕在路寢射在郊外公入爲將退迂鑒之說也古天子至庶人皆從事于射士童學舞羽旄干戚弓矢金革之事詩書弦誦之業道器一貫純成而無間也後世文武分途習詩書者爲文閑射藝者爲武周之興也武王皐弓矢以求文德聖如孔子自謂俎豆嘗聞軍旅未學古今升降聖人莫之能違矣故古

有射之害則不可無射之禮後世射廢禮遂不講噫  
乎后羿逢蒙何世無之天下可以無射不可以無禮  
士雖不學射可以不達射禮之義乎